

تيمه

الكتاب: تيمة

تأليف: يحيى محمد

الإخراج الداخلي: القسم الفني بالدار

تدقيق لغوي: قسم المراجعة والتدقيق اللغوي بالدار

تصميم الغلاف: ضياء إبراهيم

الطبعة الأولى: 2022

رقم الإيداع: 2021/29830

الترقيم الدولي: 9 - 99 - 6859 - 977 - 978

دار إضافة  
للنشر والتوزيع

ج-٢٠٠ع

الإسكندرية

ج-٢٠٠ع

الإسكندرية

Email: mazagelkotob@gmail.com

Mobile: 01024541339



مزاج الكتب  
للنشر والتوزيع

لا يسمح بإعادة طبع الكتاب أو أي جزء منه أو تخزينه  
في نطاق استعادة المعلومات أو نقله بأي وسيلة من الوسائل  
سواء التصويرية أم الإلكترونية أم الميكانيكية، بما في ذلك  
النسخ الفوتوغرافية والنشر على أشرطة أو سواها وحفظ  
المعلومات واسترجاعها دون إذن خطي من الكاتب أو الناشر.

# تيمّة

## أشعار بالعامية المصرية

يحيى محمد



## مقدمة

ذاكرة الحزن جوانا قوية جداً ومدهشة. بتقدر تحتفظ بكمية مشاعر لفترة تكاد تكون طوال حياتنا، وبتخليك كل ما تسترجع ذكري سيئة أثرت فيك، جسمك بيستعيد نفس الشعور اللي عقلك خزنه وقت ما الموقف حصل، نفس رعشة صوتك وانت بتحاول تمسك نفسك ومتعيطش، هزة رجلحك وانت بتحاول تبان قوي وجامد علشان متصعبش على اللي قدامك او يثمت فيك.

الديوان ده عبارة عن Memories عليه داتا محتفظة بكل موقف، وبكل احساس عدا علينا ومعرفناش ننساه او نتخطاه، الداتا دي بتفضل مخزنة في ركن لوحده كدا من وقت للتاني، بتطلع تنبهنا إننا مش ناسيين، ومبنساش ومش هننسي، وبتيجي حاجات بسيطة جداً تفكرنا.

أغنية ما، برفان معين، ذاكرة مكان، مواقف شبيهة، مشاعر بديلة.

متستغربوش لما الشتا بييجي ويسترجع كل الملفات المؤرشفة ف دماغنا، كل تفاصيلنا، وذكرياتنا، وحنين غريب ومُلِح لكل

نبضة قلب، خفقة حزن، لمعة فرح، بتحن لكل ذكرى بحلوها  
ومرّها.

الكتاب ده هو الشعرة البسيطة اللي ما بين انك متقرأش،  
وتفضل ناسي او تكمل وتفتكر اعتبروه منشط للذاكرة..

\*\*\*

أهلاً

لأول فرحة من صليبي.. ديچا  
انتي چيني وأكسچيني.

وإليكم..  
أهدي ديواني الأول

..4

ل اسكندرية في مواسم الحنين، للشتا والمطر والبحر  
ول محطة الرمل.  
ل قطر القاهرة - اسكندرية درجة تانية مكيفة  
ل القاهرة في الأفلام.. بكادرات "محمد خان"  
ول وسط البلد.

للأغنيات..

يا مسافر وحدك، عودت عيني، الربيع

للهاندي فري ولFormidable

وليلي مراد وهي بتقول:

لما يخاصمني بافرح وأصور. فرحة لقاء لويوم جاني..  
وان جه صالحنى أبكى وأفكر. من خوي في ليخاصم تاني.

ول عادل إمام عن واقعية فيلم "الحريف" ١٩٨٣

للموسيقى.. ليالي الأنس ف قيينا

هاني شنودة عن الشوارع حواديت "موسيقى تصويرية".

إلياس الرحباني موسيقى فيلم حبيبتي ١٩٧٥

لفاتن حمامة ومحمود ياسين

ولكل الأشياء الجميلة.

يحيي

\*\*\*



حِمل الليالي خفيف لَمَّا يشيلوه اتنين

فؤاد حداد

اخرجوا بهدوء بره الدائرة  
أنا روجي بتتكسر باللمس  
أنا يمكن بشبه تقريبا  
تلجاية بتتونس بالشمس

# تيمّة

كنا نهوي

القعاد تحت المطر

والهزار، والإندفاع، والمغامرة، والخطر

أثنين بيتقاسموا الأرق، والدهشة، والقهوة

قلبك غريزة وقلبها شهوة !!

نعس القمر سهواً

مديتي سحرك للسما تنوروا

الضلمة كات أهون

إن البشر من طلتك يسهروا

من يوم ما إحساسك جذب أحدهم

قوانين كثير ف الجاذبية - بدأوا يتغيروا-

غيرتي وجه العالم كله - جوايا - من سهرة  
وكانك انتي الأكسجين على كوكب الزهرة  
او عازفة چاز مدهشة.. بتذهل المارة  
اترجاها أرمسترونج.. تعزف كمان مره  
ولكنها..

عزفت عن عشقها للساكس،  
وعزفت لهم ع الناي  
كقهوة خارجة من ستاربكس  
ومزاجها مال للشاي

سألك أحدهم: غيرتي ليه الآلة  
رديتي: مناسبة للحالة  
وبشفقة واستماله،  
استعطفك اتنين بيمرؤا ف الشوق بيتمهلوا  
هو مشاعره تؤهله

وهي خيالها أوسع من مساحة قارة  
استغربك آخر..

قولتيه: متشوفش القصة من برة  
في الخطوتين تفاصيل.. بتوضح الصورة  
فيه خطوة متسعة والثانية مكسورة  
واحد بيحذف روجه.. وواحدة مضطرة  
مروا ف موسيقتك ومر طيفك وسطهم  
عزفك رسالة مرسله إلى أحدهم

\*\*\*

أنا وانتي كنا الميل، والليل، وعشاقه  
وعشقنا كل جميل وحزنا لفراقه  
وكإن أم كلثوم وأديث بياف اتفقوا  
ف الحزن يتلاقوا  
فصنعوا أغنية

صبحت أنا وانتي.. ومست أنا وهي  
الذكريات صعبة.. والفرقة دي غبية

\*\*\*

اتنين بيتقاسمو الحنين والوحدة والأحزان  
أول لقا بينهم كان الشتا بردان  
قسموا الهوا بالنص  
قالوا للمطر.. تحتك  
تسمحلنا نرقص!!  
طول عمرنا الباقي..  
وكإنك كنتي أصلاً رقصة ف بالية مائي  
مع كل لمسة إيد.. كان الدفا بيزيد  
ويقيد ف أشواقي  
كنتي الهوي الفتان.. مزيكا بالألوان  
شوفتك كإنك حلم  
اوزي بطلّة فيلم قديم حلوة لحد الآن،  
وكإنك كنتي أول قطفة م الإنسان

لكن مع الأيام.. أصبحنا ناس تانيين  
تيمة ناقصها كلام.. وبواقي بني آدمين

احزاننا لا بتستر.. ولا أصبحت دخان  
حزنك ترانزستور.. وحزني بالألوان  
هل لسه بالإمكان ؟  
نتحب زي زمان  
ولا احنا كنا وكان  
أصبحنا بلا قيمة  
مع أننا بنشبه للشكل والقيمة

\*\*\*

كنا تيمة  
أتنين بيقعوا ف حب أي حاجات قديمة  
صور.. أغاني.. سفر.. أماكن.. فيلم سيما  
كنا لسه قلوبنا خضرا وحاضرة نوايانا السليمة  
كنا دوشة وكنا مغني  
كنا صوتنا من دماغنا  
عقرب الأيام لدغنا  
وارتكبنا ف حقنا اكبر جريمة

وافتراقنا

واحنا لسه يادوب بنسند

بعد فترة من فراقنا

خدني جاكت جلد إسود

قاللي هتخوض المجازفة

-انت نوتة وهي عازفة-

السما الليلة أصفي

وده مش دليل ان الشتا دافي

- جددت حبك ليه !!

- مش كان كل اللي فات كافي -

بعد الفؤاد م ارتاح.. الذكريات بتحن

هو الحنين ده لها ولا الحنين للبن

هو انت مشتاق لها ولا الجراح بتئن

صدقني حاجة تجن !!

عاوز تصلح مشاعركم التالفة

واخدك شعور الحب والألفة



هو الحنين راقلك، ولا مهياًلك  
بينك وبين عقلك خلاك بتتصور  
يمكن تكون زيك دلوقتي بتدور  
يمكن تطول ضيك يلمسها ف تنور  
وتبقوا ف الحاليتين اتنين بيتقابلوا  
قسموا الفراق نصين وقرروا يقابلوا  
كل الحنين والحزن بالحضن واللهفة  
ف احتمال البرد يقرص  
والمطر ينزل مصادفة  
نرتجف ونخاف ونهرب  
نحتمي ف شارع ندهنا  
نترمي ف احضان شبهنا  
حتى لو احضانا ادفي  
لسه نقدر نمشي شارع عثمانيين في لقانا صدفة...

كسرت الحاجز النفسي من الفنجان وقررت اسأل القهوة  
أنا ليه كل اما اقربلك يزيد ضحك الحنين ف الدم ؟!  
سألت القهوة.. لم تهتم.

## يا مسافر وحدك

يا مسافر وحدك  
ومش فايت وراك حاجة  
تصحي الذكريات جواك  
أساساً مين ليه ذكري معاك؟

ومين ف الحزن كان جارك  
ومين ف الهجر كان دارك  
ومين ف الجرح طفالك  
نيران الدمع والهجران  
ومين شاركك ف ليل دمعك  
ومين ف الفضفضة سمعك  
ومين نورتلته شممعك

وسابك ف الدموع غرقان

سافر وحدك

وخذ شنطة حنين إيدك

وخذ دمعك وتنهيدك

وللمم م الشاتات عارك

وبوستاتك وأشعارك

وخذ من وقعتك عبرة

وخذ م التجربة الخبرة

ضروري ف مره هتفيدك

خد ميموري حياتك الحافلة

بيان المعجزات قافلة

بلاش تفضل عنيك غافلة

والقصة تنهيك وتعيدك

هترجع تاني وتسامح

ونفس الغلطة تتكرر  
وبكره هيشبه أمبارح  
مدام الذنب متبرر  
دموعك بالوجع أدري  
وطول م الذكريات حاضرة  
هتقدر ع الجراح أنهي؟  
متعلقش بالقشة  
جميع حجج الرجوع هشة  
خلاص كل الحنين منهي

مدام ضاق البراح.. إمشي  
مدام زاد الجراح.. إمشي  
في ناس من كتر م اتهلكوا  
دموع روحهم مابتنامشي  
ووجع القلب ما ييهداش

متستناش..

سافر وحدك

وسيب الذكري بما فيها

وسيب الوقت يخفيها

حياتهم وانت مش فيها

ماهيش واقفة

مفيش شيء انكسر بعدك

مؤكد فيه شيء بيشدك

الشيء ده جواك بيهدك

حنينك اتقلب ضدك

وبيحاربك

حنين جايز لناس مروا

ف العمر بحلوه وبمروا

فيه ناس ف القلب ييمروا  
بيدبحوا ف قلبك  
سافر وحدك  
ولا تودع ولا تسلم  
ومين كان حس بيك لما  
سهرت ليالي تتألم  
ومين كانلك سند وشريك  
ومين فكر ف يوم يواسيك  
ومين شاف القلق ف عنيك  
من غير ما تشكي وتتكلم

ومين كان النهار والنور  
ف عز العتمة كانلك ضي  
ومين كان الحياه والروح  
ف عز ماكنت ميت حي

على نار الشوق ليه تستني!

محدث جي

متاخذش ذكري تفكرك بشئ وانت رايج

سيب الشوارع والأماكن والروايح

إعمل Delete للأغاني والصور

احمي نفسك م الآثار الجانبية للسفر

ال jazz خطر ف البعد والهجر والفراق

Armstrong ييعتذر عن صُحبتك هذا المساء.

\*\*\*



"كان بنا حب وما تفاهمشي،

كان بنا حب ومات فاهمشي"



## القلق...

توتر قلبك الزايد ورعشة ايدك الدائمة  
وشيش شبائك المقفول بيحكى عن قلق واضح  
وليه نور شقتك قايد، في حين ان الجيران نائمة  
مصاحب مج قهوة قديم وفعل من الجراح فاضح  
وخوف انك تكون مكشوف  
دليل ان القلق جواك مسيطر ع الأمان بالخوف  
يعدي الصبح بالإكراه  
يعدي الليل عليك مخطوف  
مبتحسش بطعم النوم ولا الراحة ولا الألفة  
ف خنقة وضيقة طول اليوم وحزن مشاعرك التالفة  
وحالك يعني مش ولا بُد وبتحارب قلق داير  
ومن اقرب حبيب جواك على جراحك بتتعاير  
بتعشق كل شيء رايح وتهجر كل شيء موجود

لكن الذكريات بتعود  
وبتعيد الي كان منسي وقولت اهوراح  
وبترجع وجع غايين وبترجع حنين لجراح  
محدث م الألم خالي ومحدث م القلق مرتاح  
\*\*\*

"اعتكافك جوة روحك شيء بيشبه نقطة ضلمه  
خايفة تلمع وسط نور"



## ”لو كنتي فضلتي“

لو كنتي فضلتي كنت ممكن اكون بديل  
وابدل قهوتي بحضنك  
وابادل ضحكتي بحزنك  
واقاسمك كل شيء ف الحزن  
واشاركك ف العياط بالليل

لو كنتي فضلتي...  
كان هيصبح كل شيء ف الكون جميل

لو كنتي فضلتي وكنتي حاولتي تهاوديني  
وتخفي الحزن اللي ف قلبي  
وتشيلي الدمع اللي ف عيني  
لو كنتي سهرتي الليل جنبي

أنا كنت افرذلك دراعيني  
وأشيلك جوة ف درا عيني  
لو كنتي حافظتي على هوانا  
كان صعب تروحي وتنسيني  
ياغايه وسايه احزاني.. وحشتيني  
وكل حاجاتنا وحشاني  
حاولت انساكي ولكني فشلت كثير ف نسياني  
ياحاجة قريبة مني وابعد ما ف امكاني  
بحبك حب مش عارف هيطني ف روحي ايه ثاني



أنا بايخ جداً دلوقتي  
ف بلاش نتكلم من فضلك  
معلش سبيني عشان خاطري  
لما اهدا أنا هاجي وافضفضلك



## زعل

بطلت افتح عيني من كتر الزعل  
وحلفت اغمض قلبي واوارب الأحزان  
وابعد تمامًا عن أي احساس مفتعل  
واطيب خاطري لو حسنتي يوم زعلان

بطلت اتبت في اللي بيفكر يسيب  
كل اللي ساب.. بمزاجه مش قسمة ونصيب  
كل اللي غاب كان ناوي اصلاً ع الغياب  
يرجع مكانه ومطرحه ف خانة الغريب

بطلت أقيم حد بالوقت والمدة  
عاوز تعرف فلان ده.. جربه ف شدة  
عاوز تعرف غلاوتك غيب؛ وشوف مين اللي حس

فيه ناس هتبقى عادية وناس هتحبها بشده  
بطلت اسلم قلبي للي بيستغله  
فلان ده بيحبني؛ وفلان ده الله يسهله  
فيه مواقف للناس بتبينهم وبتكشف معادهم  
فيه واحد هتحس بحبه؛ وواحد هتحس بغله

بطلت امسك فاللي بيهدد ببعده  
اللي ناوي ع البعاد ببعده واساعده  
اللي ناويين يمشو مشيو  
واللي مش ناوينها قعدو

## الونس

الونس هما ولا الونس أحنا  
الونس لمة ولا الونس محنة  
فيه ناس كتير وسطنا لكن بتجرحنا  
وناس بعيد عننا رؤيتها تفرحنا  
وإذا كنت بتحبنا أول ماتلمحنا  
قرب أوي مننا ده القرب ريحنا

....

حسيت بغربة ووحده وانا وسط لمتهم  
اتفرقوا بالواحدة وانا رocht لمتهم  
غمو العيون باللوم ولا عمرها لامتهم  
خلوني أندم يوم ماعرفت سكتهم  
شافوا الونس في عنيا وأنا شوفت فرقتهم

يارتي لا عرفتهم ولا كنت حبيتهم

اتونسوا بينا.. قبل اما نفارقكم  
ده احنا اللي حبيننا واحنا اللي في فاريقكم  
كنتوا مرار ريقنا وكنا عسل ريقكم  
خدناكو في طريقنا توهنا في زواريقكم  
ايه اللي عن اعداءنا دلوقتي يفرقكم  
ياريتنا ماقابلناكم ولا ضعنا في طريقكم

....

فيه ونس يونسنا وونس بيتعبنا  
ولمة تأنسنا ولمة تكئبنا  
ولمة لودوسنا ع الشوك تأنبنا  
ولمة لوروحنا للحزن بتسيبنا  
ولمة من رزقنا والحلو في نصيبنا  
واذا كنت بتحبنا للقرب حبيننا

## ربنا يعوضها خير

على قد ما شافت حزن وبُعد وفُرقة وويل  
على قد الوحدة وقد وجع وعياط بليل  
على قد الهم وتعب القلب من التفكير  
ربنا يعوضها خير

على قد ما حسّت حيرة وتوهه وشدة وميل  
على قد ما بهت الحزن وشوه كل جميل  
على قد ما زاد الخوف جواها بشكل كبير  
ربنا يعوضها خير

عن كل ضغوط عصبية وكل برود احساس  
عن لحظة ضعف غالبها الدمع ف وسط الناس

عن كل ليالي البكا والشوق والحوجة للغير  
ربنا يعوضها خير والحضن الأمان تلاقيه  
ربنا يعوضها خير عن كل اللي مرت بيه

\*\*\*



## قاموس عمري الأبدى

لله الأسماء

ولأمي التشبيه والإهداء

بدعاها الدنيا بتتبارك

هي الكواليس هي الأجواء

ووجودها صحيح حلوا الأشياء

في صفاتنا الحلوة ب نتشارك

أنا أمي في نظري ملاك خارق

قاهر لجميع كل الأعداء

أنا أمي زمان

كانت مصدر تأمين وأمان

المادة الخام للاطمئنان

ومازلت حتى أما كبرنا

مش شايله هموم ف الكون غيرنا  
بتبني وبتهيا تفكيرنا  
إن الإنسان يفضل إنسان

احنا الدنيا وهي الجنة  
فيه حاجات مشتركة كتير بنا  
وان كنت بريد او بتمني  
ف اتمني تدوم..  
الشمس بتطلع يومياً  
أول م أي بتصحي من النوم

سيدة الكون الأولي سنين  
بتحس بحزني ان كنت حزين  
وتحس بقرصة جوع بطني  
وان كان مودي مش أحسن مود  
ضحكتها قوام بتظبطني

أنا أُمي في نظرتها مودة  
بتخلي ضجيج الكون أهدي  
حضانها بالنسبالي مخدة  
بهرب من تعب الكون ليها  
أنا أُمي قاموس عمري الأبدي  
هي العامية ومعانيها  
هي المعنية بكل البيت  
على مَر العمر شافت قسوة  
رغم انها تعبت م الهدة  
قدرت تصبح رَبَّة أسرة

\*\*\*

"ف العتمة جاز أهدى بضمة إيديكي تدلني لنور الطريق"

## زي غيابك

زي غيابك  
كل شيء ف حياتي باهت  
خطوتي شدت وتاهت  
المعاني والمشاهد كل حاجة بقت مملة  
كل حاجة حبيبتني إلا  
اني اغمض والمحك  
لمعة عيوني م الحزن خايف تجرحك  
شكي وظنوني وقلقي انك تختفي  
هاين عليا حبيبتني اخليكي تحلفي  
لكني عارف اني بتخيل اكيد  
وانك انتي رغم بعدك مش بعيد  
واني بتمني الحياة ترجع تعيد

القصه تاني بدون غيابك  
ليه ف غيابك  
الألم والحزن صابني  
كل شيء في حياتي سابني  
بس عمره ف يوم ماسابك

حتى وانتي ف اكتئابك  
غيبتي ليه لما أكتئبت  
سبتي فيا حنين وكبت  
بلعب مع الدنيا اتغلبت  
والوضع متشابك

ليه ف غيابك  
الفراق يا حبيبتي ثابت  
والعيون م الحزن دابت  
م السهر الاشتياق

زي ما نكون اتفاقنا  
نجرب أنا وانت في فراقنا  
كل انواع الفراق

كنت بيكي بمتلك عمري وما فيه  
النهاردة أنا بسألك سبتيني ليه ؟  
قوليلي أسبابك.

\*\*\*

"وجع ووحدة وشوق وسُكات..  
وشات يبهون المسافات"



## مساء الخير

مساء الخير

أود تكوني لسه بخير وفكراني  
وفاكرة عملت ايه عشانك  
ومعملتيش حاجة عشاني  
وفاكرة يوم ماسبتيني  
غريق مش لاقى قشاية  
واحساسك وانا بضحي  
بأخر جزء جوايا  
بيحدفني الأمل ليكي  
وايدك رافضة تنقذني  
وقولتي بكل جبروتك  
ازاي بعد ده كله عايزني؟  
روح شوف حياتك وانساني

مساء الخير

يارب تكوني لسه بخير وفكراني

وعايشة زي ماربتي

وسعيدة بالشخص الثاني

وعارفة ان انتي يا حبيبتي

صمام مسدود ف شرياني

وفاكرة حاجات كتير بنا

لا يمكن اقولها ف ديواني

وفاكرة انك كسرتيني

وحيلي اتهد علشانك

وكنت بموت ف أوجاعك

وبتدمر ف احزانك

ولما بتترسم ضحكة

على شفايفك بطير م الفرح

ولما بتتولد دمعة

على خدودك بموت م الجرح

واحس بخوف وشوك ومرار

وقلبي بيتحرق بالنار

يمر حزنك عليكي بسيط

يمر حزنك عليا انهار

ورغم ده كله ولا مره

شاركتيني في احزاني

مساء الخير

مساء من غير كلام تاني

\*\*\*



## الرصيف

كان الرصيف ممتد

مكشفش سري لحد

وانا كنت بس آود

لو ودني خيالها

كان ممكن اسألها

هل حبتيني بجد؟

فترد بغيابها

وتسبني وحداني

كان الرصيف ممتد على مد احزاني

خني العياط واشتد سندات ع العمدان

عبد الوهاب كان صوته بينبعث م الحان

معرفش ده كان بكا ولا دي ألحان

معرفش فعلاً كل ده كان ليه ؟  
داب الرصيف من كتر ما الحزن مر عليه  
كان الرصيف ممتد  
وانا قلبي كان طبال  
قرر بأنه يموت  
رقصاً على الأطلال  
ولكنه عاش بالفعل  
سنوات عجاف كالمر  
كان من هنا ييمر  
جائز يعود الود  
جلس العجوز على الأرض  
بتونسه القناديل  
يحكي لسكاري الليل  
عن قصه مكتملتش  
عن بنت تشبه دار  
بيطل منها نهار

بيوضح الأشياء  
واضاف ببعض الحزن  
شيئاً من الأشواق  
ضجوا الجلوس ضحكاً  
ع الذكري ب استهزاء  
وقف العجوز محتج  
وتمعنأ ف السرد  
انتاب ايديه رعشه  
جائز تكون م البرد  
بدأ العجوز بالفعل بالخطوة يتلاشي  
والكادر ع الشاشة  
على ناس بتضحك عند  
بنمط لاتيني ردئ مكتوب عليها

The End

تبان ف الضحكة شخبطي  
يبان ف ملاحي سوء خطي  
تبان تجاعيدي في وريدي  
يبان العجز في ارادتي



## صدمة

تمهيداً

اتنين يجمعهم نفس الأمل ف الموت  
حجم الألم ييزيد فوق احتمال الصوت  
اوقات خروج الروح م الجسم بيدوى  
يا من أحلّ علاج النفس بالأحضان  
خفف على ضعف الجسد وجع الكيماوى  
ب اختصار الحاله كانسر والوضع مأساوى  
مبدأياً

إن ورده تشد حيلها فوسط صحرا  
وتبقى حزن يضم نحلّه  
مُرهقه هتمر صُدفه  
أوفرشه تنجى من فح النيران

وتقرر إن حياتها أحلى  
حتى لو كان موتها ادفى  
شيء يجعل للأمل ف قلوبنا مأوى  
هو بيقاوم ف ضعفه وضعفه أقوى  
وهى اضعف من مساومة او مقاومة شيء ف أرضه  
الف هاجس صار يطاردة  
احتمال تنهار ارادته  
وتبقى دافع ل انهيار ارادتها برضه  
او تعارضه بحضن املا ف الحياه  
قرر وصمم مرغماً يبعدها فترة  
والبعاد شيء م المخاطرة  
آمنلها من انها تنهار معاه  
البنات دى لحظه سقوط اخر امل من شعرها  
كل البنات ف القاهره قصوا الضفاير  
كل البنات ف القاهره رقصوا ف دواير  
كل البنات ف القاهره مشيوا ف مسابير  
للمطالبه وللمسانده وللتساوى

باختصار الحالة كانسر  
والأمل مابقاش يساوي

زاد الوجع كرهًا ف كل الأورده  
والموت على شفا جرف هار  
بدأ الجسد ف الانهيار  
كان كل شيء حواليه مُهياً للوداع  
كان كل شيء غير العلاج مفعوله اسرع م الشفا  
قرر يودع دينته رقصًا ف كل الأرصفة  
والرقص شيء لا يدعوا ابدأ للخلج  
والموت أجل  
ف اليوم ده تحديدًا  
كسرت دوافع كبريائها وقررت تنزل تروحله  
مهماش هي التبدأ ولا هو  
كل الى كان يفرق ساعتها انها تضعف بقوة  
وتحضره وتنهى العلاج

نزلت بتسبق ف الزمن املاّ ف حُضنين احتياج

ف اليوم ده صمم انها ماتجيش

ف اليوم ده أَمّن انها ماتجيش

ف اليوم ده نام على صدرها مصحيش

مقامتش م الصدمه

ربما مامتتش م السرطان ف حينها

لكنها ماتت كا بنى أدمه.

\*\*\*

بتحضن نفسها ف رقصة..  
وتركن حزنها ف ضحكي  
أكمل روحها لو ناقصه..  
تكمل روجي لو تحكي



## مرسال في الخريف

كانت هناك  
واتمهل في الخطوه على نفس الرصيف  
يمكن لقاهم صدفه يتكرر هنا  
يمكن تقابل ضحكته تشبه ضحكته  
يمكن في مره تعود بمرسال في الخريف  
فيه رجاء تبطل تنتظر  
وتمرر السنه للسنه

في انده أنا:  
يا سايبه نفسك للصدف  
وعايشه على وعد اللقا  
عمرك بيجرى بدون هدف

روحك بتستنزف شقا  
لكنّ صوتي بينتهي رغبة هتاف  
أنا اه عايزها تحسني لكن بخاف

هربت دموعها كالمطر متفرقه  
غُلبت عيونها تنادى فيه ارجع بقى  
دابت بروحها المرهقه تناجى الغياب

يمكن سمع

جايز

أكيد

أوربما

كانت بتبعت روحها جوابات للسما  
يمكن ف مره تعود بمرسال ف الخريف  
فيه رجاء تبطل تنتظر حضن اللى غاب  
ف اناديها من باب العتاب:  
يا مكمله برغم الألم



الحضن شيء مش محتمل  
وبعتى روحك لا استلم  
مراسيلها ولا بعت الأمل

لكنَّ صوتى بينتهى رغبة هتاف  
أنا اه عايزها تحسنى لكن بخاف

أنا ذكرى قصه شاهدها كان هذا الرصيف  
وقت اما بان إن الأمل أصبح ضعيف  
اتمهلت ف الخطوه جاوزت تضييف  
واحد يغير مجرى روحها الميتة  
يمكن تقابل حضن تقدر تنسى فيه  
يمكن بكاهها يقل او يمكن تضييف  
قائمة دموعها لضمن امطار الشتا  
ف انده بصوت نبراته تايهه مُشتته:  
يامعيطه الأحزان بكا

بیر العیاط مسموم وجع  
كل الدموع مستهلكه  
كل الی جنبك مش جدع

یالی ارتضیتی بوعد متلوث دنس  
إنی ارتضیت بالوحدة فضل عن الونس

طوبی لمن قتلہ الهوی  
ف اما ابتلی بالوحدة قال  
"أنا للوحدة وإن إليها المرتجع"

\*\*\*

## هل فرشت الحزن ليلاً

مُحتمل

مُجمل الوقت الى مر

من لقانا للغياب

كان جسر يوصل ما بين

شوق اللقا وصبر العتاب

وكأي "كان" من بعدها

مررت بسنتين اكتئاب

حبتني شاعر بأمل ف روحها المربكة

وسابتني شاعر بلجاً لأرصفة البكا

للعلم بس، اني ارتضيت من بعدها بالتهلكة

بس الغريب اني استمررت ف احتياجها

جربت ابطل حضنها لقتنى بحتاجها  
عديت بنكسة حزن فشلت ف علاجها  
مریت بفترة خوف وكبت  
ملیت من الوحدة اکتئبت  
جایز بعث من الوجة مرسال بینزف فضفضه  
جایز فرشت الحزن لیلاً أو تلحفث الفضأ  
جایز کتبت  
جایز من الخوف ارتکتبت  
عیاط وصبر  
ابعت جوابك للسما  
ولا ابعتہ للقبر؟

یا رافضه حروفي تنساکی  
وحاضره ف کل جملة شعر  
ف خانة السعر  
من غیرك بساوی مافیش

ف خانة الوحدة

شبه بعيش

ف خانة كل شيء جاي

مايجوزلش

ف خانة الاحتياج عايز

لكن الدنيا مبتديش

ف ارجو

لو كنت بتسمعي صوتي

بلاش تبكي، الجراح كافية

ولو عيطت سامحيني

عشان إيد الفراق جافيه

ووعد عليا هضحكك

ان شالله اضحكها بالعافيه

لكن عاتب عليك ف شيء

ازاي نكون بنبدأ سوا

وتروحي تختصري الطريق!

وإزاي يليق الموت بينت عيونها بتحب الحياه  
وازاي بنبدأ عمرنا لحظة ما نوصل منتهاه  
ياللحياه

مضطر لخروج فلسفي عن خط سير هذا العمل  
النص ده

هيصيبك ب اكتئاب مزمن  
ووحده وعياط مُحتمل  
مافيش مفر من الوجد  
ومافيش مساحه من الأمل

الحزن صديقي بيعشقنى  
وبياكد دايماً صداقتنا  
الشارع ف نوفمبر يشبه  
للجزء الخاوى ف علاقتنا

الخوف بيطارد مُعظمتنا  
وبيحاصر ارواحنا الهشه  
كلنا مرضى بداء الوحده  
بنتعلق ف الدنيا بقشه

لو كان الموت يومها اختارنى  
او حتى اختار غيرك انتى  
مش كنا هنسهر دلوقتى  
او جايز ننزل نتمشى  
مش يمكن كنا بنتفرج على فيلم  
وقاعدين نتعشى  
مش جايز جنبنا بلاى ستيشن  
ومراهنك على ماتشين كوره  
تتغلبى وتتحمقى بسرعه  
وتقولى ان العيب ف اللعبه  
يا تعيد الماتش يا مش لاعبه

مش كنا هنضحك ف الصورة ؟

رغم ان أنا عاتب على موتك

متأكد انك معذورة.

\*\*\*



لما انكسر خطي  
كنتي انتي بتخطي  
فوق ضعفي وإرادتي  
وأنا كنت لسه بضم  
روحك ف شخبطتي



مواساة

(١)

مزاجك ساء

مزاجك ساء لهذا الحد

لهذا الحد مختاره

ومختاره

تخوني الوقت ف الوحدة

ف بتخوني

برغم ان انتي بتكوني

في نقص فراغ

ناتج دوشة صراع داير

مابين روحك

وبين توهتك ف مية واحده

وخوف ناتج عدم ثقتك

ف دافع ضعفك الأقوي  
ي حبك دائماً الزايد  
ي تكرار خطأك الدائم  
ف عشق قلوب بتستقوي  
ف دام بينك وبينك سد  
يامش واثقة ولا مأمنه أساساً حد  
ليه وجعك زاد لهذا الحد؟!

\*\*\*

(٢)

مساء الحزن

مساء الحزن والوحده  
مافيش واحده  
في يوم شبت  
بروحها للسما املاً  
ف نظرة لشخص كان روحها  
وكان حزن بجميع الناس  
وكان كتف وسند واساس  
وبيططب على جروحها  
مافيش واحده ف يوم شبت  
نزلت مجبورة الخاطر  
وبرغم ان النتيجة مافيش  
يومياً روحها بتخاطر

(٣)

اكتئبت

اكتئبت!

ضحكي كبت.. حزني كبت

جيت لعبت الدور غلبت

قولت اكمل ف اتغلبت..

عند زهر

ضربة واحدة بتيجي خبط

ضربتين ف القلب.. قهر

كسر زهر

يوم يمر

اتنين

تلاته

عشرة

شهر

والوضع بيزيد استياء

والقلب بيزيد اشتياق

والبعد بيزيد ف الغباء

والجرح بيزيد الوجع والعيون تشمت تعاير

والوحدة طبع يغلب الحزن الي داير

وانا مش هعبر مهما ألفت وكتبت

أكتئبت.

\*\*\*



(٤)

دخان سجايك

دخان سجايك

قهوتك

چاكت حماكي من المطر

سهرة شتا

تفاصيل

حنين

أحضان

دفا

وحاجات كثير عاشت سنين

وانتي الوحيدة الميتة

\*\*\*

(٥)

يا وردة

وطل الحزن ف عنيكي  
وبالين شكله من برة  
يا وردة الشوك جرح فيكي  
والجرح هنك ميت مرة  
شمسك مابقتش بتدفي  
حزنك جواكي بيكفي  
بكفي ميلت اسقيكي  
وكفي مش مكفيكي  
هتدبل وردتك فيكي وتتوفي

\*\*\*

(٦)

## الكسرة

قالتلي وهي بتحاول تكون المره دي أقوي  
غلُبت ادور ف الحياة على صاحبة جدعة تكونلي أخت  
لفيت ودوخت..

عرفت صحاب بتتلون وعشقت قلوب بتستقوي  
وخذت من الوجع صاحب جدع جداً وكان مآوي  
وخذت من البكا راحه وغسلت الهم بدموعي  
مشيت ف الوحده ألفين ميل ومين أهتم برجوعي  
ومين ف الشدة كان طوعي ومين كان كسرف ضلوعي  
لكن عارف.. الكسرة المره دي أقوي.

\*\*\*

(٧)

## مبيناسبكش

لو كان دلوقت مابيناسبكش  
وحنينك نازل جواك نكش  
بيفتش عن ذكرى مابتموتش  
بتفكر قلبك بالي عانيت علشان تنساه

لو كانت الذكرى بتنبش نبش  
والشوق بيهبش جواك هبش  
عدي النسيان ولكنه ماسبش  
غير كل اللي انت فشلت كثير علشان تنساه

\*\*\*

قل للحبيب  
إن النصيب.. قسمه ونصيب  
وان العجيب إن احنا مخترناش نصيب  
بس النصيب.



## خارج سياق الدراما

## بنت

انت عايز بنت ينفع  
تحضنك من دون ملامسه  
بنت ينفع تبقى ضمة  
وتبقي ضحكة وتبقي لمسه  
بنت تنسي الكون ف عينها  
لو تخاف تفضل حاضنها  
بنت بين قلبك وبينها  
شيء بيربط اقوي من ١٠٠ مستند  
هي عايزه بس حد يكون سند  
قلب ينفع يبقي قلب  
ويبقي أب ويبقي حضن  
حد يتحول لضمّة  
ف وقت فرح ووقت حزن



لما تحتاج ايد تطبطب  
تبقى اول ايد ايديه  
عايزه حد يخاف عليها  
وهي برضه تخاف عليه  
تبقى وقت اللعب بنته  
وتبقى وقت الجد أمه  
هو محتاج روح تضمه  
بنت ينسي ف حضنها تعب وشقاه  
بنت ف الأحزان معاه  
بنت تتحول حياه  
اولو تعب يحضنها يهدي  
بنت تقدر تبقى فرح  
يخلي رتم الحزن اهدي

\*\*\*

## أنا بنتك

أنا بنتك اللي انت ابنها  
وحبيبتك اللي يهملها  
وقت التعب.. تتعب معاك  
وتكون دواك وتكون سند  
أنا بنت كتبت قلبها باسمك  
وحبها مُستند  
أنا بنت على هيئة براح  
تحضنها ترتاح م التعب  
أنا لحن حلو بتسمعه  
لو كل دقيقتين اتلعب  
أنا حضن ضمك لما همك زاد  
وكان غير محتمل  
أنا بنت بتصحي كل نهار

تلقاها على هيئة أمل  
أنا روح لروحك لما تضعف  
أو جروحك تبقي أقوي  
أنا قلبي ملجأ لما تلجأ  
أو تكون محتاج لماوي

\*\*\*

## يا رب هي

يارب هي، وبیت، وشغل، وراحه م الهده  
يارب بدل تعبي خير وزود قربنا موده  
ونتشارك في كل جميل  
ونتقاسم سهر بلیل  
نأسس دنيا ونساهم  
ووقت زعلنا نتفاهم  
ونتأنس بإحساسنا  
ونتونس ببعضينا  
ونرسم كون على مقاسنا  
نعيش فيه أنا وانتی وحدینا  
واحط دماغی علی کتفک  
اریح م التعب واهدا

\*\*\*

## اكفينا

اكفينا شر البُعد والكسرة والخِذلان  
واكفينا شر البرد لو كان مافيش أحضان  
واكفينا شر الورد لو كان ماليه الشوك  
واكفينا شر الشوك لو من بني الإنسان  
اكفينا شر الناس وكلامهم المعسول  
واكفينا شر الهم والحزن لما يطول  
واكفينا شر الجرح لما بياذي الروح  
وادينا طولة الفرح وافتحلنا المقفول



## أول من آمن

أنا أول من آمن بالبنت  
إن كانت مثلاً مخدوعة  
بتخاف جداً وثقتها تقل  
وان كانت دائماً موجهة  
ف الحزن لو حده يساوي الحل  
الحزن ان دل على مشاعرك  
وان لم وجعها وداوى روحها، تنسي جروحها  
تخلصك جداً، تحديداً لو بيها أمنت  
وانا أول من آمن بالبنت  
البنت الساكتة اللي تملي بتلتزم الصمت  
م الصعب انها أصلاً تحكي  
وان نطقت ف اسمعها بروحك

واحضنها ان فجأة قامت تبكي  
ترتحلك جداً وتأمينك إن وثقت فيك  
تطمئن لوليها اطمنت

\*\*\*



فضفضى كل الى اتفضفضلك  
نفضى همك بقا من فضلك  
وارفضى كل دواعى الحزن  
لو تحزنى.. هخذك بالحضن  
لو تأذنى.. عمرى م هرفضك



## ایموشن بیضحك

(١)

یدوم حزنك دوام روحك  
وترتاح بس بعد الموت  
تضم الضلمه بجروحك  
تحب اللمه من غیر صوت  
وتعشق ف السكات هیبتہ  
وتعشق ف ال فات غیبتہ  
تفكر كام واحد سابك  
وتنسي كام واحد سیبتہ  
تلف ف دايرة الأيام  
ولما تنام

بيان حزنك ف تنهيدة

وراها سكوت

....

(٢)

كأنك لون كئيب الروح  
نتج عن مختلط احزان  
كأنك كون وبات مجروح  
صبح جوه القلوب بهتان  
كأنك ركن للنسيان  
كأنك حضن ناقصة امان  
كأنك حزن غاوي يكون  
كأنك صرخه  
بتشق الكلام ب سكون  
وناقصك روح

.....

(٣)

يا رافض تصحي من وهمك  
أنا مش فاهمك  
في شيء ف الوهم بيناسبك  
بتمسك بكونك فيه  
فيه شيء ف الحلم بيحاسبك  
فييموت الأمل بعديه  
في نقص وجود أمل ف الدم  
حياة مش واصله لوريذك  
في روح ممكن تموت اذا لم  
تداوى الشرخ ده بإيدك

....

(٤)

على طرف الضحكه المكسوره  
متكلفت ب لحاف احزانك  
بتحاول تضحك ف الصوره  
قلقان ل يكون دمعك خانك  
بتدور على ضحكه مناسبه  
وبتغلط دايماً ف الحسبه  
وخسارتك بتزيد ف النسبه  
مابقاش شيء ف حدود امكانك  
.....

(٥)

أنا روجي تعبت م الوحدة  
ودي إحدى عيوب روجي  
ماحبش احتاج للأشخاص  
ولا مهتم بالأحداث  
أنا مره زمان عاشرت الناس  
لقيت تيمة البشر واحدة  
حقيقي..  
أنا عندي نقص فراغ من دوشة الوحدة

.....



(٦)

وبرغم انك شاقق التربة  
عودك شاخ  
وبرغم انك عاشق الغربة  
وجودك باخ  
وبرغم هذا وبرغم ذاك  
وبرغم وجعك انذاك  
عمرك م كرهت الايام  
عمرك م أذيت الازالك  
طرحك فوق ارضك دبلان  
لم يلتئم جرحك للآن  
وبرغم هذا بتقول تمام  
ماينبش عليك انك زعلان  
ماينبش عليك انك إنسان  
مابقاش بيلأمك أي مناخ

(٧)

إيموشن بيضحك م الوجع

بيموت مقلش

عدي عمره ف ايه ؟!

مسألش

خبا صندوق الحكاوي

بره قعدات القهاوى

خبا حزن كبير يساوى

كلام بان ف العيون متقلش

كلام مات ف القلوب وماقلش

كلام داب ف الهزار مات أَلش

.....

(٨)

وكانك مغلوب على أمرك  
مفرحتش ولا مره ف عمرك  
وكان الحزن ملازمك داء  
كل ما بتحب حاجه بقوه  
بتنتهي بفراق  
كل اما بتضحك من جوه  
دموعك تشتاق  
ف بتسكت وتسلم أمرك

....

(٩)

أنا لابس وش بلاستيك

رابط احزاني بأستك

مضبوط على وضع الضحكة

هتشوفي تقول fantastic

.....

(١٠)

الحلم جبان  
جواك محبوس  
الوهم حصان  
طايح بيدوس  
وما بين لاتنين  
بتزيد توهان  
ومنين على فين  
وبدون عنوان  
بتسلم حلم  
وتمضي كابوس

.....

تبادر غياب  
تغادر تتوه  
جميع الي غاب  
حبايوا اشتاقوه  
جميع الي ساب  
كان سايب عشان  
اتعشم ف ناس  
ولكن سابوه.!

وفجأه أقوم ضاحك أوي  
ومزاجي ميال للهزار  
ده مش هبل يا جماعه لأ  
ده علاج تفادي الانتحار

## مجملاً

خليني اقولك مجملًا  
إن الهوي صدفه  
وإن اللقا صدفه  
وإن الوجد كان رد فعل  
اتنين م وقفوش ف العلى

....

عقلك مكنش مؤهلاً  
يستوعب الألم الكبير  
حاول مع النسيان كتير  
وكأنه لسه بينجرح حالاً  
الدنيا إجمالاً  
بتكذب ف العموم  
وتجذب اولاً



خليني اقولك ربما  
نن العيون شايل بُكا  
والقلب متصاب بالerma  
خليني أوصفلك كما  
شوفت الدموع مالیه الفضأ  
الحزن مش محتأج دوا  
محتأج لخصن وفصفضه

\*\*\*



## بلوتو

كإنك بلوتو..

ابعد واحد ف صحابك عن ضوء الشمس

اخترت بإيدك تبقي وحيد

كوكب معزول ميت صوته

احساسك بقي هش وباللمس

تنجرح الجرح يزد ويزيد

ومشاعرك جواك ييموتوا

سايب بكره وعائش بالأمس

وكلامك كله عبارة عن همس

وكإنك كوكب بيردد ف صدي سكوته



## الليل ونس

الليل ونس  
والبحر صاحب غير وفي  
والموج بيحذف روحه فينا  
كأنه عايز يحتمي  
كأنه عايز يترمي  
تحتينا منعاً للرحيل  
وده شيء مجازاً؛ مستحيل

الوقت خوف  
والخوف مُصاحب فلسفي  
يقنعنا ان الموت هروباً منه خوف  
وان خوف الموت

ف نفس الوقت موت  
يقنعنا ان العمر؛ متلازمة سكوت

\*\*\*

## شتا ناقص دفا

مع إني بعشق السما..  
والليل،  
وصوت البحر  
واللمة  
والحكايات  
من بعدك انتي ربما  
مابقاش فاضلي  
إلا راحتي في السُّكّات  
وادي القمر ف غيابنا غاب  
ضيه انطفي  
زود جراحي ف الغياب  
زاد في الجفا

وادي الزمن بعدك وقف  
عند الشتاء قبل اللي فات  
فات بعد منه كام شتا ناقص دفا



## بار

كات بنت تشبه بار  
متعبي بالأسرار  
حواليه سكري كتار  
تضحكهم بدلال  
وتصب روحها ف كاس  
مدت شعورها الخام  
بايديها للأيام  
ف اتحولت لرخام  
جائز عليه إقبال  
لكن بدون احساس



## بورتريه

ماشية السنيورا

أنا قلت لأمعادتش موجودة

تاها ما بين الزمن

وما بين "هاني شنودة"

شوفت الرصيف لامع  
قلت اكيد مرت هنا بنت غالبها العياط  
فتشت ف وشوش البنات لقتني مش شايف  
نديت وحواليا السكات لقتني مش سامع  
"الشوارع حواديت ملهية، في حواديت الشوارع"

حريف محمد خان  
دارت معاه البليه  
احلام فارس ضايعة  
مع هند وكامليا  
والمعضلة الصايعة والتيمة والحنكة  
احلامنا بفيونكة  
وبتنتهي بسرعة..



## الحريف

فارس ده كان لعيب  
واد حرفته الكورة  
واللعب ع المشاريب  
شايب وسنيورا  
لكن ولد بصحيح  
لا يكل ولا يتعب  
وقت ام يبقي فيه لعب  
لازم فارس يلعب  
حريف ف شوط الحلم  
واللم والترقيص  
فارس بدون جواد  
عامل فاته الأتوبيس

"خانه البخت ف الدنيا وحالفه الحظ ف الملعب"

كسبان ف أي رهان

حريف ف قلب الملعب بيغلب الرهوان

قرر ف اخر ماتش.. يلعب مع الخسران

فارس مكنش فارس فقط

فارس ده كان أحنا

يشبه لنا جدآ ف الحزن والمحنة

قابل يكون إنسان ف مادة الدنيا

فارس ده كان لماح دايماً عنيه قارية

رافض يكون خامة زمن البروليتاريا



## موعد على العشاء

بكاء سعاد حسني  
بث ف وريدي الحزن  
وعيون احمد ذكي  
اخذت نوال بالحضن  
كوافيرجي أسمر حرفته يقدم خياله للزبون  
اتقابلوا واتلاقوا العيون  
الحب يومها اتولد من ذروة المعاناة  
وبمجمال المأساة..  
كانت نوال وقتها بتودع الأحزان  
وبتنتظر احزان  
اتنين بيخطفوا م الحياه لحظة حياة  
من غير قلق او خوف  
او ضغط اي ظروف

لكن ساعات الحزن يبجي بالإكراه  
أحمد ذكي بيموت وبتنتهي الأحلام  
وف ذروة الأحداث وبقوة مدهشة  
بعثت سعاد لحسين دعوة على العشا

\*\*\*

"بمحب الشمس والصبح البشوش،  
واحب الحب لکني معرفهوش"



## المحطة

### المحطة

كأت شبه خاليه من البشر  
والوقت كان واقف بعيد  
ببراقب الأحداث بصمت  
القطر كان طيف ع المدى  
وانا كنت متبعتر وجع  
أنا كنت م الحزن اتقطمت  
ساند بروحي على الرصيف

وقعت

قمت

وقعت تاني

وقمت تاني

ثابت مكاني

تحت حته من اللى فاضل فيها ضى

القطر فاتنى ؟

ولا لسه القطر جى

الشنطه فيها من الهموم قمصان

ترزى الزمن فصل مقاسى من الوجع چاكت

الفرح كان صياد

الحزن كان قرصان

الحضن كان بهتان

النبض كان ساكت

الصبر كان يعنى!

كان سهل افضفض لأول شخص يهتم إنه يسمعني

كان سهل أعيط وسط ضحكي لما اجيب سيرتك بشوق

كان صعب جداً لما احب ف مره اشوفك ابص فوق

رغم إن ممكن أي حد يشوفني واهم أو عيان

بس أنا فعلاً لما بطول السما بلاقيكى، فاردته جناحك

نفس روحك، نفس ملامحك، نفس حنانك، نفس زمان  
نفس الحزن الساكن فيكي ونفس جراحك  
ف انزف بكا على هيئة دم ورید مشتاق  
وانزف عمر من الأحلام انتهى بفراق  
وانزف روح  
وارقص تحت السما رقصة شريان مدبوح  
واتفادی ذكری واخبی صندوق الحنین  
ف المهملات  
واتناسی واضحك وابقا روح من لوح ازاز  
تلمسنى اتكسر عياط  
تجمعنى اتبعتر فصام  
كنت بهرب للزحام  
وسط الحروف بنحبط كلام  
ايه يعنى حضن القاهرة يبقالي روح  
لو كنت تمثال شمع  
ايه يعنى حضن القاهرة يبقالي بير

لو مره فاض الدمع  
ايه يعنى حضن القاهره بيقالي عين  
لو يوم صابنى العما  
ايه يعنى مصر!!!  
ايه يعنى بعشق بنت سافرت للسما  
وانوى السفر واتعرا من ضهر اتجلد  
واتبرا من طين البلد  
تصادفنى كلمه ف مره صدغه سمعتها  
عمر الهروب م داوا الألم  
جارنا العجوز قالها الى حكمه  
إياك تفرط ف التراب  
لو تتجلد تحت العلم  
ريحة الشوارع روح مالهاش ف الغربه زى  
وانا لسه واقف تحت حته من اللي فاضل فيها ضى  
القطر فاتنى؟!  
ولا لسه القطر جى.



الحلوف الموضوع ان انتي وحشاني  
والقلب لو موجوع عشان انتي وحشاني  
ف بحق كل دموع ببيكيها.. وحشاني!



## رفقاً بنا

يا قلوب بتأخذ روحنا

وتخطف النور مننا

يا عيون بتسرق شوقنا

وتجری تبعد عننا

رفقاً بنا

رفقاً ب عابر بحر دمع من الحنين ومن الألم

رفقاً بساعى بريد بعث جوابات بكاء بتحمل عياط

رفقاً بطابع بوسطه فى جواب مُستلم

مرسل بدون عنوان إلى

مُهمل فى خانة الأحتياط

كان هو آخر شاهد فى قصة حبنا

يوم م ابتليتى بالتعالى

واتمليتى بالغرور  
وابتديتى تبني سور  
واتماديتى ف البنا  
وكسرتى اخر حنة فيا كانت أنا  
ف مشيت لأول مره اعيط  
وفيا من الوجع عبره  
وواخذ خبره  
من جرحك وتجربتي  
وروحى لاجل تتخيظ  
بكام غرزه  
وكام أبره  
وكام مشتاق  
وكام ندمان على حبيبتى  
وكام نقطه  
وكام هبدأ  
وكام مره نويت انهى

ونهيته السطر بالفاصله  
وكام واقفة  
وكام مبدأ  
وكام مره ارتبط فيها  
والاقى مشاعري مش واصله  
وكام مره اكرهك فيها  
واقول كات واحده ولا تسوى  
وكام مره اترمي ف احضان  
واسيبيها ب منتهى القسوه  
واكرر نفس تجربتي  
ف كسر قلوب بتهواني  
وبتحول بدون م اقصد  
لشخص وصولي وانانى  
ف بقلع هدمه المجنى  
وبلبس هدمه الجانى  
هقول تانى

فضلاً نبطل نترمی  
ف أحضان بتسرق عمرنا  
فضلاً نبطل نختمی  
ف أشخاص بتعشق ضعفنا  
فضلاً نبطل فضفضه  
بتعری روحنا قصاد عیون  
هوایتها تفضح سرنا  
فضلاً نبطل ما مضی  
إدمانه مش هیصحی شیء  
كان یوم هنا  
رفقاً بنا.

\*\*\*

اللمه توب إسود غميق  
طايج ف ارجاءه الدنس  
والعزله حاله من النقاء  
والوحده حاله من الونس





## عندك ايه

عندك ايه؟

أنا عندي زيك

احكى واملا فراغ فضانا

احكى ليه وانا زي زيك

والليالى مفضفضانا

.....

عندى نقص ف روح ابويا

عندى حيره ف حضن أمى

برسم الأحضان ب بويه

بلمس الأحساس بدمى

بحضن الصور اللى فاضله

لما محتاجهم اوى

عندى شوق لعيون وليفى  
عندى شك ف صدق طيرى  
عندى خوف من غدر خلى  
فوية انه يروح لغيرى  
عندى احساس انى دائماً  
شبه انسان منش سوى

....

احكى ليه وانا كل مره  
بخاف وبهرب م العلاج  
عندك ايه

غير شعور الوحدة دائماً  
او شعورك ب احتياج

.....

فكرة ان الوحدة ارحم  
فكره لا تحتاج دراسة  
صاحبك القناص ف ضيقتك

اقصده ف اول رصاصه  
ضهرك المحمى بحواجز  
صد عنك الف سهم  
لسه نصل الغدر عاجز  
طول م جنبك شخص شهم  
.....

عادى جدآ لو هتهوى  
او يكون لعنيك عشيقه  
او تكلم واحدة شهوه  
بس عجاها الطريقه  
....

او تكمل نقص عندك  
حتى باستنزاف مشاعر  
أو تموت جواك لو حدك  
عادى جدآ مانت شاعر  
وانت عارف فين دواك

عندك ايه

غير شعور الوحده دايمآ

وان روحك مش معاك

\*\*\*

العمر مش مضمون والحب مش مضمون  
والمغزي والمضمون انك مازلت عبيط  
حببت لكنك مُت.. ومُت فَا تحببت.!



# كورونا

موجة تانيه..

سرير داخل مستشفى خاص  
ممنوع وجود حواليك اشخاص

وناس ليها الثواب والأجر

بتدعيلك لوش الفجر

١٤ يوم ف الحجر

مش ف الدنيا

....

موجة أقوى..

رئتين بتتنفس أقل

الحالة ملهاش أي حل

باختصار الوضع مؤسف

كامل الأشياء بتوصف  
إن الأمل شبه انعدم  
والقيرس الملعون هدم  
بأيديه جميع سبل الحياة  
الوضع واصل منتهاه  
والروح فيها صراع مُحْتَدَم

...

مشهد اخير  
كل شيء حواليه مُهَيَأ  
نبضه خافت نفسه ضيق  
عاوز نفس  
اخر نفس  
شهيق..... ورغبة ف الزفير.



## الفهرس

مقدمة .....	٥
اهداء .....	٧
تيممة .....	١١
يا مسافر وحدك .....	١٩
القلق .....	٢٧
"لو كنتي فضلتي" .....	٣١
زعل .....	٣٥
الونس .....	٣٧
ربنا يعوضها خير .....	٣٩
قاموس عمري الأبدى .....	٤١
زي غيابك .....	٤٥
مساء الخير .....	٤٩
الرصيف .....	٥٣
صدمة .....	٥٧
مرسال فالخريف .....	٦٣
هل فرشت الحزن ليلاً .....	٦٧
مواساة .....	٧٥
مساء الحزن .....	٧٨

٧٩ .....	اكتئبت
٨١ .....	دخان سجايك
٨٢ .....	يا وردة
٨٣ .....	الكسرة
٨٤ .....	مبيناسبكش
٨٧ .....	خارج سياق الدراما
٨٨ .....	بنت
٩٠ .....	أنا بنتك
٩٢ .....	يا رب هي
٩٣ .....	اكفيننا
٩٥ .....	أول من آمن
٩٩ .....	ايموشن بيضحك
١١٥ .....	بلوتو
١١٢ .....	مجمالاً
١١٧ .....	الليل ونس
١١٩ .....	شتا ناقص دفا
١٢١ .....	بار
١٢٣ .....	بورتريه
١٢٧ .....	الحريف
١٢٩ .....	موعد على العشاء

١٣٣ .....	المحطة
١٣٩ .....	رفقاً بنا
١٤٥ .....	عندك ايه
١٥١ .....	كورونا

\*\*\*



مزاك الكتب  
للنشر والتوزيع

ج.م.ع

Email: mazagelkotob@gmail.com

Mobile: 01024541339